

ticinés via pal múnd

"www.ti.ch/oltreconfiniti" par métras in contàtt e scoltà la vós di noss emigrànt, da terza generaziòn e la "new emigration".

testo Pier Baron - pier@illustrazione.ch

Gli inglés i disaréssan che emm fà quaicoss che ga soméa al "foreign office", alúra podréssum ciamàll l'"ufficio affari esteri" dal noss Cantón. "Oltreconfiniti" al ma permett da guardàg denta in dala nosa emigraziòn, quela di ùltim centcinqant'ann. La sa ciama "piattaforma interattiva". Social network, par fàla cürta. E fass capì. L'eva propi inscì: quand che vers la metà dal Vottcènt (e fin a la segúnda guèra mundial) iè nài via dal Tesin in quaranta-cinquantamila. Ul cantón al cüntàva 150 mila ànim. Chì da nüm a gh'eva tanta famm (indigenza). Se sa stàva chì, l'òblig l'eva da "tagliare l'ultimo ciuffo d'erba" e cürig adré ai bésti siii sbricch. Inscì che par mandà a cà un quai ghèll (scüd) a sa podéva domà tö sü. E nà. Via pal múnd. **In quasi tütta l'Europa**, ma anca California, Súdamerica e Australia, da là dal màr. A gh'emm dúnca quii dala terza-quarta generaziòn (che i pàrlan magari dumà spagnöö e inglés), quii dala "new-nova emigration" e i "ri-entrati", tornàt indré cunt una sfràca da fadìgh ma anca da esperienza. E quaicoss da mett in pratica, anca chichinscì da nüm. Dèss pö, l'è üga. Parché gh'emm l'Università, l'USI, la SUPSI e tanti bei ropp, che guarda ianànz. Inscì ul Cantón l'ha ciapàt in man ul balín. Dal 1. d'agost a ghè ul "sito" <http://www.ti.ch/oltreconfiniti>. L'ha métüt insemma un giúvin, che la dovüt anca inventàss i solúzion. Ul Mattia Bertoldi, che dal

1. da màg la fai un progètt che ga piàs anca ala Pro Ticino. Da quasi cent'ann l'associazion l'è la bandéra di ticinés föra via, cunt una trenténa da sezión in Svizera e una vinténa là da li, da Paris (lì ghè stai l'ùltim congress) a San Francisco. E anca visin a Melbourne, in Australia.

Ghè tanti possibil interesàt: l'AITI, la Camera di Commercio, Ticino Turismo... e storicamént sa ga dà anca ul giüst valór ai libar dal Giorgio Cheda e da altri noss scritór, che ià fà memoria süla emigraziòn. Dovréssom, cunt i nüm, mia véss tant distànt dai 100 mila föra via (comprés i ticinés "ciapàt" cunt i matrimoni), inscì da slargà i noss confin. E anca da parlàss cunt i àlter svizer, parché "Oltreconfiniti" l'è tacàt a www.swisscommunity.org (Organizaziòn di svizer a l'èster, OSE). Quanti ticinés, da Berlin, Roma e New York, i cogaóssan la "gént che cünta". Inscì l'è un bóff, grazie a lór, dàg un bütt al noss turismo, ai contàtt economic, ai scambi che sa pò, e che sa dovréss fà.

Tanto piü che i noss emigrànt iè mai nài a colonizza, ià mai dopràt né füsü né pistol. Ià fà l'interess di naziòn "ospitanti". Se a nii in di noss sit trövuf cà, gés, capèll, asili, scöl fai sü cunt i "scüd che vegn da là". Gira una sfràca da ropp, béi e brütt, da cüntà sü. Inscì che adèss tanti i sa dà da fà, cunt ul "albero genealogico" di sò gént. L'è anca ul titol dal libar dal Piero Biancon. Se ghü vöia e témp, va consili da (ri)-lége! ♦